



PATNUBAY SA MISA

26 Setyembre 2021

Ika-26 na Linggo sa Karaniwang Panahon

Taon B

PAMBANSANG ARAW NG MGA MANDARAGAT

Sa Paaralan ng Diyos na Bukas-Palad

Ngayong huling Linggo ng Setyembre, pinasasalamat natin ang Panginoon sa maraming biyaya na ipinagkaloob Niya sa atin sa buwang ito. Tunay Siyang Diyos na bukas-palad. Ginaganyak din tayo ngayong lumagong espirituwal sa kagandahang-loob. Hinahamon tayong magsaayos ng ating mga pinahalagahan at maging handa sa anumang maaaring ibunga ng gayong pagpapahalaga.

Pagkat ngayon ay **Pambansang Araw ng mga Mandaragat**, alalahanin natin ng may tanging pagmamahal at pagmamalasakit ang tatlong daang libong Pilipinong mandaragat sa iba't ibang panig ng daigdig. Nagtatrabaho silang malayo sa kanilang mga tahanan alang-alang sa maginhawang buhay at magandang kina-bukasan ng kani-kanilang pamilya. Nawa ang pag-aalay natin ng Eukaristiya para sa ating mga mandaragat ay maging isa sa pinakamagandang tanda ng ating pakikiisa sa kanila.



PASIMULA



Pambungad

(Ipahayag lamang kung walang awiting nakahanda.)

Lahat ng iyong ginanap ay makatarungang lahat, yamang kami'y sumalungat, parusa'y yong inilapat. Hiling namin ay patawad.

Pagbati

P –Ang biyaya at kapayapaan buhat sa Diyos Ama, Panginoong Hesukristo, at Espiritu Santo ay sumainyong lahat!

B –At sumaiyo rin!

Pagsisisi

P –Mga kapatid, sa paghahanda natin para sa pagdiriwang ng mga Banal na Misteryo, tingnan natin kung inangkin din natin ang itinatampok ng Ebanghelyo. (Manahimik saglit.)

P –Para sa aming pagkainggit at

pagtatangkang angkinin ka, Panginoon, kaawaan mo kami!

B –Panginoon, kaawaan mo kami!

P –Para sa aming pagwawalang bahala sa malungkot na kapalaran ng mga dukha sa aming lipunan, Kristo, kaawaan mo kami!

B –Kristo, kaawaan mo kami!

P –Para sa aming pagpili sa agarang kasiyahan nang di alintana ang masama nitong maibubunga sa aming buhay espirituwal, Panginoon, kaawaan mo kami!

B –Panginoon, kaawaan mo kami!

P –Kaawaan tayo ng makapangyarihang Diyos, patawarin tayo sa ating mga kasalanan, at patnubayan tayo sa buhay na walang hanggan.

B –Amen!

Papuri

B –Papuri sa Diyos sa kaitaasan

at sa lupa'y kapayapaan sa mga taong kinalulugdan niya. Pinupuri ka namin, dinarangal ka namin, sinasamba ka namin, ipinagbubunyi ka namin, pinasasalamat ka namin dahil sa dakila mong angking kapurihan. Panginoong Diyos, Hari ng langit, Diyos Amang makapangyarihan sa lahat.

Panginoong Hesukristo, Bugtong na Anak, Panginoong Diyos, Kordero ng Diyos, Anak ng Ama. Ikaw na nag-aalis ng mga kasalanan ng sanlibutan, maawa ka sa amin. Ikaw na nag-aalis ng mga kasalanan ng sanlibutan, tanggapin mo ang aming kahili-ngan. Ikaw na naluluklok sa kanan ng Ama, maawa ka sa amin. Sapagkat ikaw lamang ang banal, ikaw lamang ang Panginoon, ikaw lamang, O Hesukristo, ang Kataas-taasan, kasama ng Espiritu Santo sa kadakilaan ng Diyos Ama. Amen!

Panalanging Pambungad

P –Ama naming makapangyarihan, ang iyong pinakadakilang magagawa ay magpatawad at ang iyong laging ipinakikita ay pagkahabag. Padaluyin mo sa aming walang humpay ang kagandahang-loob mong sa ami’y inilaan upang sa pagkakamit namin sa pangako mong bigay, kami’y gawin mong kasalo sa ipagkakaloob mo sa kalangitan sa pamamagitan ni Hesukristo kasama ng Espiritu Santo magpasawalang hanggan.
B –Amen!

PAGPAPAHAYAG NG SALITA NG DIYOS



Unang Pagbasa *Bil 11:25-29*
Ganap na malaya ang Diyos sa pamamahaging Kanyang mga kaloob. Bagamat Siya ay may nakatakdang mga “karaniwang daluyan,” kumikilos din Siya sa labas ng mga “kayariang opisyal.”

L– Pagpapahayag mula sa Aklat ng mga Bilang

Noong mga araw na iyon, ang Panginoon ay bumaba sa anyo ng ulap at kinausap nga si Moises. Ang pitumpung matatanda ay binahaginan niya ng espiritu, tulad ng ibinigay niya kay Moises. Sila’y napuspos ng kapangyarihan at nagpahayag noon ngunit hindi na nila inulit.

May naiwang dalawang matandang lalaki sa kampo: Eldad ang pangalan ng isa at yaong isa’y Medad. Tinawag silang kasama ng pitumpung ngunit hindi sumama. Gayunman, binahaginan din sila ng espiritu ng Panginoon kaya sila’y nagpahayag na roon. Nakita pala sila ng isang binata at patakbo itong nagpunta kay Moises. Sinabi niya, “Sina Eldad at Medad ay nagpapahayag sa kampo.”


Dahil dito, sinabi ni Josue na anak ni Nun at katulong ni Moises, “Bakit di ninyo sila sawayin?” Ngunit sinabi ni Moises, “Nangangamba ka bang ako’y mababawasan ng karangalan? Mas gusto ko ngang maging propeta ang lahat ng Israelita at mapuspos sila ng espiritu ng Panginoon.”

Ang Salita ng Diyos!
B –Salamat sa Diyos!

Salmong Tugunan *Awit 19*

B –*Ating kabutihang luag ay nasa loobin ng D’yos!*

R. M. Velez



* Ang batas ng Panginoon ay batas na walang kulang; ito’y utos na ang dulong sa tao ay bagong buhay. Yaong kanyang mga batas ay mapagti-tiwalaan, nagbibigay ng talino sa pahat ang kaisipan. *B.*

* Yaong paggalang sa Poon ay marapat at mabuti, isang banal na tungkulin na iiral na parati. Pati mga hatol niya’y matuwid na kahatulan; kapag siya ang humatol, ang pasya ay pantay-pantay. *B.*

* Ang utos mo, Panginoon, sa alipin mo at lingkod, ay mayroong gantimpala kapag aking sinusunod. Walang taong pumupuna sa gawa n’yang hindi angkop, kaya ako ay iligtas sa lihim na gawang buktot. *B.*

* Ang lingkod mo ay iligtas sa hayag na kasalanan, at h’wag mo pong itutulot na ako ay pagharian. Mamumuhay akong ganap na wala nang kapintasan, ako’y lubos na lalaya sa kuko ng kasalanan. *B.*

Ikalawang Pagbasa *San 5:1-6*
Ipinaaalaala sa atin ni Santiago ang mga tinatanggap nating biyaya sa buhay na ito ay hindi para sa ating makasariling kasiyahan, kundi para makatulong tayo sa mga nangangailangan. Ang kapabayaan dito ay hahatulang mariin ng Diyos.

L– Pagpapahayag mula sa Sulat ni Apostol Santiago

Pakinggan ninyo ito, kayong mayayaman! Tumangis kayo at humagulgol dahil sa mga kapighatiang darating sa inyo. Bulok na ang inyong mga kayamanan at kinain na ng tanga ang inyong mga damit. Kinain na ng kalawang ang inyong ginto at pilak, at ang kalawang ding iyon ang magiging katibayan laban sa inyo at parang apoy na uubos sa inyong laman. Iyan ang kayamananang inimpok ninyo para sa mga huling araw. Sumisigaw laban sa inyo ang upa na hindi ninyo ibinigay sa mga gumapas sa inyong bukirin. Umabot

sa langit, sa pandinig ng Panginoon Makapangyarihan sa lahat, ang mga hinaing ng mga mang-aani na inyong inapi! Nagpakalayaw kayo at nagpasasa dito sa lupa. Nagpataba kayong parang mga hayop na papatayin. Hinatulan ninyo at ipinapatay ang mga matuwid; hindi sila lumaban sa inyo.

Ang Salita ng Diyos!
B –Salamat sa Diyos!

Aleluya

B –Aleluya! Aleluya!

Amang D’yos ni Hesukristo, ang salita mo’y totoo. Kami ay pabanalin mo. Aleluya! Aleluya!

Mabuting Balita *Mc 9:38-43.*
45.47-48

Tinuruan ni Hesus ang kanyang mga disipulong maging maunawain at mapagbigay, pagkat walang kabutihang hindi gagantimpalaan, at walang masamang hindi parurusahan. Ganito ang mensahe ng Ebanghelyo ngayon.

P–Ang Mabuting Balita ng Panginoon ayon kay San Marcos

B –Papuri sa iyo, Panginoon!

Noong panahong iyon, sinabi kay Hesus ni Juan, “Guro, nakakita po kami ng isang taong nagpapalayas ng mga demonyo sa pamamagitan ng pangalan mo, at pinagbawalan namin sapagkat hindi natin siya kasamahan.” Ngunit sinabi ni Hesus, “Huwag ninyo siyang pagbawalan, sapagkat walang taong matapos gumawa ng kababalaghan sa pangalan ko ang agad magsasalita ng masama laban sa akin. Sapagkat ang hindi laban sa atin ay panig sa atin. Sinasabi ko sa inyo: sinumang magbigay sa inyo ng isang basong tubig dahil sa kayo’y kay Kristo ay tiyak na gagantimpalaan.

Mabuti pa sa isang tao ang siya’y bitinan ng isang malaking gilingang-bato sa leeg at itapon sa dagat kaysa maging sanhi ng pagkakasala ng isa sa maliliit na ito na nananalig sa akin. Kung ang kamay mo ang nagiging sanhi ng iyong pagkakasala, putulin mo! Mabuti pa ang mapunta ka sa langit nang putol ang isang kamay kaysa may dalawang kamay na mahulog ka sa impiyerno, sa apoy na hindi mamamatay.

Kung ang paa mo ang nagiging sanhi ng iyong pagkakasala, putulin mo! Mabuti pa ang mapunta ka

sa langit nang putol ang isang paa kaysa may dalawang paa na mahulog ka sa impiyerno. At kung ang mata mo ang nagiging sanhi ng iyong pagkakasala, dukutin mo! Mabuti pa ang pumasok ka sa kaharian ng Diyos nang bulag ang isang mata kaysa may dalawang mata na mahulog ka sa impiyerno. Doo'y hindi mamamatay ang mga uod na kumakain sa kanila, at hindi mamamatay ang apoy."

Ang Mabuting Balita ng Panginoon!

B – Pinupuri ka namin, Panginoong Hesukristo!

Homiliya

Sumasampalataya

B– Sumasampalataya ako sa Diyos Amang makapangyarihan sa lahat, na may gawa ng langit at lupa.

Sumasampalataya ako kay Hesukristo, iisang Anak ng Diyos, Panginoon nating lahat. Nagkawatang-tao siya lalang ng Espiritu Santo, ipinanganak ni Santa Mariang Birhen. Pinagpakasakit ni Poncio Pilato, ipinako sa krus, namatay, inilibing. Nanaog sa kinaroroonan ng mga yumao. Nang may ikatlong araw nabuhay na mag-uli. Umakyat sa langit. Naluluklok sa kanan ng Diyos Amang makapangyarihan sa lahat. Doon magmumulang paririto at huhukom sa nangabubuhay at nangamatay na tao.

Sumasampalataya naman ako sa Diyos Espiritu Santo, sa banal na Simbahang Katolika, sa kasamahan ng mga banal, sa kapatawaran ng mga kasalanan, sa pagkabuhay na muli ng nangamatay na tao at sa buhay na walang hanggan. Amen!

Panalangin ng Bayan

P – Ipinaaalaala sa atin ng mga pagbasa ngayon ang mamuhay sa tanglaw ng kautusan ng Diyos at paglabanan ang lahat ng kakitiran ng pag-iisip. Pagkat batid natin ang ating kahinaan, pakumbaba tayong manalangin:

B – Panginoong Diyos, maawa Ka sa amin!

* Nawa lahat ng Kristiyano ay maging laging handang maki-pagtulungan sa lahat ng mga taong tapat sa pagtataguyod ng anumang mabuti. Manalangin tayo! **B.**

* Nawa maging bukas ang pag-iisip ng mga pinuno ng ating mga pamayanan, gaya nina Moises at Hesus, sa pag-unawa sa kilos ng Espiritu, kahit na sa labas ng mga "kayariang opisyal" ng Simbahan. Manalangin tayo! **B.**

* Nawa ang ating mga mandaragat at kanilang pamilya ay manatiling tapat sa kanilang kapangakuang Kristiyano at mapanatili ang pagmamahalan sa kabila ng kanilang pagkakalayo sa isa't isa. Manalangin tayo! **B.**

* Nawa maipagkaloob ng mga among tagapagpagawa sa mga namamasukan at ng mga opisyal sa gobyerno sa kanilang mamamayan ang anumang nararapat para sa kanila. Manalangin tayo! **B.**

* Nawa mapagtanto nating lahat na ang mga biyaya at kayamanang ipinagkaloob ng Diyos ay hindi upang itago at kamkamin kundi dapat na ibahagi lalo na sa mga nangangailangan. Manalangin tayo! **B.**

* Tahimik nating ipanalangin ang ating mga pansariling kahalilingan. (*Tumigil saglit.*)

Manalangin tayo! **B.**

P–Panginoong Diyos, turuan Mo kaming magalak sa kabutihan ng iba at makipagtulungan sa kanila sa pagtataguyod ng mga pagpapahalaga ng Kahariang itinatag ng Iyong Anak. Ikaw na nabubuhay at naghahari magpakailanman.

B – Amen!



P– Manalangin kayo . . .

B– Tanggapin nawa ng Panginoon itong paghahain sa iyong mga kamay sa kapurihan niya at karangalan, sa ating kapakinabangan at sa buong Sambayanan niyang banal.

Panalangin ukol sa mga Alay

P – Ama naming Lumikha, loobin mong ikalugod ang aming paghahandog at ito nawa ay siyang magkaloob ng iyong pagpapalang sa ami'y umaagos sa pamamagitan ni Hesukristo kasama ng Espiritu Santo magpasawalang hanggan.

B – Amen!

Prepasyo I

P – Sumainyo ang Panginoon!

B – At sumaiyo rin!

P – Itaas sa Diyos ang inyong puso at diwa!

B – Itinaas na namin sa Panginoon!

P – Pasalamat natin ang Panginoong ating Diyos!

B – Marapat na siya ay pasalamat!

P – Ama naming makapangyarihan, tunay ngang marapat na ikaw ay aming pasalamat sa pamamagitan ni Hesukristo na aming Panginoon.

Sa dakilang pagtubos niya sa amin ang kasalana't kamatayang aming pasanin ay binalikat niya upang kami'y palayain at maitampok sa iyong luningning. Siya ang nagtanghal sa amin bilang liping hinirang, pari at haring lingkod sa iyong kamahalan. Mula sa kadiliman, kami'y iyong tinawag upang makasapit sa iyong liwanag bilang iyong angkang may tungkuling maglahad ng iyong dakilang pag-ibig sa lahat.

Kaya kaisa ng mga anghel na nagsisiawit ng papuri sa iyo nang walang humpay sa kalangitan, kami'y nagbubunyi sa iyong kadakilaan:

B–Santo, santo, santo . . .

Pagbubunyi

B– Aming ipinahahayag na namatay ang 'yong Anak, nabuhay bilang Mesiyas at magbabalik sa wakas para mahayag sa lahat.



B– Ama namin . . .

P– Hinihiling namin . . .

B– Sapagkat iyo ang kaharian at ang kapangyarihan at ang kapurihan magpakailanman! Amen!

Paanyaya sa Kapayapaan Paghahati-hati sa Tinapay

B– Kordero ng Diyos . . .

Paanyaya sa Pakikinabang

P– Ito ang Kordero ng Diyos na nag-aalis ng mga kasalanan ng sanlibutan. Mapalad ang mga inaanyayahan sa kanyang piging.

B– Panginoon, hindi ako karapat-dapat na magpatuloy sa iyo ngunit sa isang salita mo lamang ay gagaling na ako.

Antipona ng Pakikinabang
(Ipahahayag lamang kung walang awiting nakahanda.)

Ang pangako mo sa akin ngayo'y iyong gunitain. Pag-asa kong tatanggapin kahit aba sa 'yong tingin ang pagsamo ko't dalangin.

Panalangin Pagkapakinabang

P –Ama naming mapagmahal, ang aming banal na pakikinabang ay magdulot nawa ng kagalingan sa aming katauhan upang kami'y makatambal sa kaluwalhatian ng aming nilalahukan sa tiniis na kamatayan na amin ngayong ipinahayag sa ginanap na pagdiriwang sa pamamagitan ni Hesukristo kasama ng Espiritu Santo magpa-

sawalang hanggan.

B –Amen!



P –Sumainyo ang Panginoon!

B –At sumaiyo rin!

P –Magsiyuko kayo at ipanalangin ang pagpapala ng Diyos.
(*Manahimik saglit.*)

–Sa Kanyang pagmamahal, puspusin nawa kayo ng Panginoon ng Kanyang karunungan upang mapili ninyo at gawin ang kalugud-lugod sa Kanya.

B –Amen!

P –Pagkalooban Niya nawa

kayo ng pusong mapagbigay na nagagalak sa kabutihang taglay o ginagawa ng iba.

B –Amen!

P –Bigyan Niya nawa kayo ng lakas na kailangan ninyo para sa paggawa ng malalaking sakripisyo upang magkamit ng buhay na walang hanggan.

B –Amen!

P –At sumainyo nawa ang pagpapala ng makapangyarihang Diyos: Ama, Anak, at Espiritu Santo magpakailanman.

B –Amen!

P –Humayo kayo sa kapayapaan upang mahalina at paglingkuran ang Panginoon.

B –Salamat sa Diyos!

ANG MATUTO SA DIYOS NA MAGING MALAWAK ANG PAG-IISIP

Jess P. Balon • Isinalin ni Cecilia G. Valmonte, EdD

Nahirapan marahil si Hesus sa paghubog sa kanyang mga alagad. Ang kanilang mga kapintasang moral ay lumalabas sa kanilang mga kilos at pag-uugali. **Ang tangka nilang pigilan ang isang nagpapaa-lis ng masamang espiritu sa ngalan ni Hesus dahil lamang sa siya ay hindi kasamahan** (sangguniin Mc 9:38) **ay nagpapakita ng pagkamakabukod na lubos na hindi tugma sa pagiging panlahat na pahayag ni Kristo.**

Nagpipilit umiral ang pagmamataas, kasakiman at inggit sa puso ng mga tao. Binubulag nito ang mga tao sa paninawalang sila ang pinakamahusay at sa gayon ay di dapat “madungisan” ng mga “mababang lahi” o mga uri.

Ito ay isa sa mga dahilan kung bakit marami tayong mga balakid sa ating buhay, at ating nasasaksihan ang pagdami ng mga **barkadahan, mga “kapatirang samahan”, sindikato, mga grupong elitista** na ang tanging iniisip ay ang pagbukod sa mga hindi nila kasapi. Ang mga ito

ay **pawang pagmamataas, pagkamakasarily, diskriminasyong panlipunan, at may kinikilang ngang lahi!**

Kapag ang ganitong mga anyo ng pagmamataas ang ginawa nating panrelihiyong katuwiran, para na nating hinahangad na sarilinin ang Diyos at turuan Siya kung paano patakbuhan ang mundo.

Ang tuksong sarilinin ang Diyos at makialam sa Kanyang gawain ay matagal ng panganib para sa ilang taong-simbahan. Ang gayong pag-uugali ay ganap na pagtatatwa sa tunay na pananampalataya.

Ang pananampalataya, una sa lahat, ay kababaang-loob. Ito ay paghahangad na hayaan ang Diyos na maging Diyos.

Hayaang maging malaya ang Diyos – malaya sa Kanyang mga pagkukusa; malayang gamitin ang Kanyang mga kaloob at mga tao sa paraang alam Niyang makabubuti. Walang sinuman ang dapat na magtakda sa Diyos sa mga balangkas na kinabibilangan

ninuman . . . kahit pa taglay ng mga balangkas ang Kanyang pangalan at nagmula sa Kanya.

Ang Diyos ay sadyang higit na dakila kaysa anumang makamundong balangkas o pananaw. Ang Kanyang karunungan ay sumusunod sa pamamaraang di alam ng nakahihigit sa pinakamarunong pa sa atin. **Kayang gamitin ng Kanyang pag-ibig ang mga makasalaan upang ang mga santo ay lalo pang maging banal.** Kaya Niyang gamitin ang bagsik ng mga tagausig upang dalisayin ang Kanyang Simbahan at gawin itong lalong matatag, mapagpakumbaba, at tapat sa kanyang Panginoon.

Sa sandaling maunawaan at matanggap ang ganitong pangunahing Kristiyanong katotohanan, maigagalang natin ang kalayaan ng Diyos at magsisikap para sa katuparan ng isa sa mabibigat na kahalilingan sa “Ama Namin”— **“Sundin ang loob Mo!”** Ang kalooban ng Diyos, hindi ang sa atin! Saka tayo magiging bukaspalad sa mga di natin kauri.



**WORD & LIFE
PUBLICATIONS**

Don Bosco Compound, A. Arnaiz Ave. cor. Chino Roces Ave., Makati, Metro Manila

Postal Address: P.O. Box 1820, MCPO, 1258 Makati, Metro Manila, Philippines

Tel. Nos. 8894-5401; 8894-5241; 8475-8945 • Website: www.wordandlife.org

• E-mail: marketing@wordandlife.org; wordandlifepublications@gmail.com • FB: Word & Life Publications

• Editorial Team: Fr. S. Putzu, Valmonte, J. Domingo, M. Vibiesca, V. David, R. Molomog, D. Daguio

• Illustrations: A. Sarmiento, B. Cleofe • Marketing: J. Feliciano • Circulation: R. Saldua